

Sila semak semasa dilafazkan

UCAPAN YANG AMAT BERBAHAGIA
DATIN SERIDR SITI HASMAH BT HAJIMOHD ALI
SEMPENA MAJLIS PELANCARAN
PAN PACIFIC & SOUTHEAST ASIA WOMEN'S
ASSOCIATION OF MALAYSIA (PPSEAWA)
CHAPTER PULAU PINANG
DI ANJUNG WANITA MASYARAKAT PENYAYANG,
PULAU PINANG
PADA HARIISNIN, 23 NOVEMBER 1998
JAM 11.30 PAGI

Pagi yang bersejarah ini sekali lagi membawa kecemerlangan ke Pulau Mutiara. Walaupun yang dilahirkan itu disebutkan sebagai Chapter atau Bab, sebenarnya usaha ini melebihi bab dan lebih menyerupai sebuah buku. Kegemilangan wanita Pulau Pinang disambut oleh kami semua dari Kuala Lumpur dengan gembira dan penuh kesyukuran. Tahniah dan syabas kepada wanita Pulau Pinang yang sekali lagi meninggalkan kesan dalam sejarah pergerakan wanita Malaysia. 'To those who left their footprints in the sands of Malaysian Women's history, our congratulations and salutations'.

2. Kegawatan ekonomi kini melanda Asia dan beberapa negara Eropah menyebabkan antara lain peningkatan kadar kemiskinan, pengangguran dan pembesaran jurang pendapatan. Taraf hidup rakyat di beberapa negara di Asia Timur turut terjejas, terutama sekali golongan berpendapatan rendah, termasuk kaum wanita.

3. Adakah ini trend dan arah kita di abad duapuluh satu, alaf baru? Masalah di Kosovo dan Palestin menghampakan pendamaian dunia, sambil keadaan malapetaka seperti di Honduras, Nicaragua dan Bangladesh, yang meragut nyawa lebih daripada 10,000 orang baru-baru ini, memerlukan kegigihan, komitmen dan tanggungjawab secara kolektif. Sejauhmanakah golongan wanita terdaya membantu dalam proses pendamaian dunia, pembangunan sosial dan penyusunan semula masyarakat yang miskin dan terpinggir? Bolehkah gerakan wanita berjaya dalam usaha perundingan konsultatif dan kolektif dan apakah peranan kita dalam menggerakkan kepimpinan dunia menerima kompromi dalam proses perundingan?

4. Dalam alaf baru, saya percaya gerakan-gerakan wanita akan menjadi lebih kukuh dan bermakna. Dengan pembangunan tokoh-tokoh politik wanita di negara-negara Asia, pemimpin wanita di rantau Pasifik dan Asia Tenggara akan menyertai dan menyumbang dengan lebih berkesan kepada kejenteraan politik formal dan birokrasi awam. Proses pendamaian boleh

tercapai jika golongan-golongan wanita teriibat dalam perundangan di peringkat tempatan dan global. Apakah keistimewaan wanita yang sudah dibuktikan dalam proses pendamaian dan perundangan? Pertama ialah kemahiran perhubungan manusia ataupun skills in human relations. Kedua ialah pengurusan dan pembangunan sumber manusia, ataupun human resource management and development. Ketiga ialah pengurusan konflik ataupun conflict management. Keempat berkait dengan pentadbiran konsultatif dan bertolak ansur ataupun negotiatory and consultative administration. Dan akhir sekali berhubung dengan pengasuhan nilai-nilai murni ataupun the socialisation and nurturing of spiritual values.

5. Sekiranya lima sifatkewanitaan ini, secara asli dan terlatih digabungkan dalam proses pembangunan politik dan sosial, saya percaya bahawa wanita boleh membawa dunia ini kepada keadaan yang lebih aman dan makmur. Kaum wanita hams berganding bahu dengan kaum lelaki untuk mencapai keamanan dunia.

6. Bagi wanita-wanita di negara ini pula saya percaya jika kita saling bantu membantu antara satu sama lain dalam usaha membawa kejayaan negara, wawasan kita untuk menjadi negara maju akan mudah tercapai. Masalah kegawatan ekonomi yang kita hadapi sekarang tidaklah seteruk yang dialami olehjiran-jiran kita. Saya percaya kita akan dapat atasinya dengan menjalankan tanggungjawab kita bersama.

7. Proses pendamaian bermula di rumah, kampung dan masyarakat dan negeri dan negara-negara bebas tidak dapat menikmati kebebasanjika konflik di rumah, kampung dan masyarakat di bawa ke negara dan dunia. Kebebasan diri mempertahankan maruah diri sendiri tetapi kebebasan negara mempertahankan maruah semua warganegara, lelaki dan wanita, belia dan orang tua. Sebagai wanita, kita hams melindungi diri dan keluarga dan mempertahankan maruah tetapi sebagai wanita dalam satu pergerakan antarabangsa, kita tidak dapat mengabaikan imej dan maruah negara. Dengan perasaan yakin dan penuh kegigihan marilah kita memperjuangkan nasib dan masa depan negara yang kita cintai ini. Kita tidak, TIDAK, boleh mengharapkan orang asing memperjuangkan nasib kita dan mempertahankan kebebasan kita. Sebagai kaum dan keluarga PPSEAWA, objektif kita ialah mencapai kedudukan tinggi dengan proses-proses yang berharmoni, aman dan damai. Kaum wanita boleh mainkan peranan yang penting dalam menyumbang kepada kesejahteraan negara dan dunia.

8. Justeru itu saya berharap PPSEAWA, Bab Pulau Pinang akan berusaha untuk membantu usaha-usaha Kerajaan meningkatkan lagi status kaum wanita supaya mereka mi tidak ketinggalan di dalam arus pembangunan. Pencapaian cemerlang kaum wanita baik dari segi politik, ekonomi mahupun sosial akan memberi manfaat yang besar kepada negara kita. Memandangkan kaum wanita merupakan lebih kurang 50 peratus dari penduduk di negara ini

maka penglibatan mereka yang positif dalam pembangunan negara akan membolehkan rakyat mencapai kehidupan yang lebih sejahtera.

9. Saya berharap semoga dengan dedikasi dan komitmen ahli-ahli PPSEAWA, kita rakyat di negara ini akan mencapai kemakmuran, dan keamanan selaras dengan cita-cita kita menjadi bangsa yang maju. Dengan berkat Allah Subhanahu wa Ta'ala, saya dengan sukacitanya merasmikan Pan Pacific Southeast Asia Women's Association, Penang Chapter, Penang.
